

ساعات المصيبة      اعله العيله الغريبه  
بهالليله الرهيبيه      الله يبعد الشر

\* \* \* \*

ليلة وداع ابكربلا بأخر مسيّه  
جناح المنيه يرف باراضي الغاضريه  
سهم الأجل أنوى يصيب ابن الزجيه  
بس هالسواد وباچر مفارق الخلان

بالخميّه عند حسين اجت محزونه زينب  
تحمل وجعها والگاب بأهاته ينحب  
وگفت تباصر حيرته بحسراته يلهب  
يحيي اويه ربّه والدمع بعيونه غدران

ينظر للوديعة      مهجتها وجيعه  
تدري بالفجيعه      خلت جوفه يسعر

\* \* \* \*

لازم افاده بو علي يكسر الخاطر  
ساعات ويگضي في صبيحة يوم عاشر  
جسمه سايب ايطل على التربان عافر  
عاري ترض صدره اعوجية آل سفیان

مذبوح ضامي من الكفا مرمي بالتراب  
مرفوع راسه اعله الرمح وتشوفه لحباب  
أنصاره حوله مضرّجه بدمها شهالمصاب  
تبگی الحرم بايتامها بولية العدوان

بس من تهجم الخيل      نار وفجعة الويل  
ضيعه بعتمة الليل      منهو اعليها ينغر

\* \* \* \*

ليله على العتره أبد ما مر مثلها  
قوس الصبر ينفل اذا تبدد شمالها  
تكلى ويتامي مفرهده بذبحه أهلها  
تصبح على دموم الأطايب نسل عدنان

كافي يليل العاشر ارحم هالنساوين  
لا تنكضي خوف الفجر يفجعها بالبين  
لا خيمه تبكى الها ولا يبكى لها حسين  
تمشي بهضمها ميسره من غير وليان

نسوه تگطع البید      تصبح فرجه چن عيد  
تدخل مجلس ايزيد      ريته ايجيها حيدر